



14 Januari 2022
14 January 2022
P.U. (A) 11

WARTA KERAJAAN PERSEKUTUAN

FEDERAL GOVERNMENT GAZETTE

PERATURAN-PERATURAN TAMAN NEGARA PULAU PINANG 2022

PENANG NATIONAL PARK REGULATIONS 2022

DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA TAMAN NEGARA 1980

PERATURAN-PERATURAN TAMAN NEGARA PULAU PINANG 2022

PADA menjalankan kuasa yang diberikan oleh subseksyen 11(1) Akta Taman Negara 1980 [*Akta 226*], Menteri, selepas berunding dengan Pihak Berkuasa Negeri, membuat peraturan-peraturan yang berikut:

Nama dan permulaan kuat kuasa

1. (1) Peraturan-peraturan ini bolehlah dinamakan **Peraturan-Peraturan Taman Negara Pulau Pinang 2022**.

(2) Peraturan-Peraturan ini mula berkuat kuasa pada 17 Januari 2022.

Tafsiran

2. Dalam Peraturan-Peraturan ini, “Taman” ertinya Taman Negara Pulau Pinang yang ditubuhkan di bawah seksyen 3 Akta Taman Negara 1980.

Fi

3. (1) Mana-mana pelawat yang masuk ke dalam Taman hendaklah dikenakan fi konservasi mengikut kategori pelawat yang dinyatakan dalam Jadual Pertama.

(2) Mana-mana pelawat yang menjalankan apa-apa aktiviti di dalam Taman hendaklah dikenakan fi aktiviti mengikut jenis aktiviti yang dinyatakan dalam Jadual Kedua.

(3) Bagi maksud subperaturan (2), fi aktiviti—

(a) berhubung dengan aktiviti yang dinyatakan dalam perenggan 1, 2 dan 3 Jadual Kedua hendaklah kena dibayar kepada Taman apabila suatu permohonan permit diluluskan di bawah subperaturan 4(3); dan

(b) berhubung dengan aktiviti yang dinyatakan dalam perenggan 4, 5 dan 6 Jadual Kedua hendaklah kena dibayar kepada Taman apabila masuk ke dalam Taman.

(4) Mana-mana orang yang memberikan perkhidmatan pelancongan di dalam Taman hendaklah dikenakan fi perkhidmatan pelancongan mengikut jenis perkhidmatan yang dinyatakan dalam Jadual Ketiga dan fi itu hendaklah kena dibayar kepada Taman apabila permohonan permit diluluskan di bawah subperaturan 4(3).

(5) Mana-mana orang yang tidak membayar mana-mana fi di bawah peraturan ini melakukan suatu kesalahan dan boleh, apabila disabitkan, didenda tidak melebihi satu ribu ringgit atau dipenjarakan selama tempoh tidak melebihi enam bulan atau kedua-duanya.

Permit

4. (1) Mana-mana orang yang berhasrat untuk menjalankan apa-apa aktiviti yang dinyatakan dalam perenggan 1, 2 dan 3 Jadual Kedua atau memberikan perkhidmatan pelancongan yang dinyatakan dalam perenggan 1 dan 2 Jadual Ketiga hendaklah memohon permit daripada Ketua Pengarah.

(2) Permohonan bagi permit yang disebut dalam subperaturan (1) hendaklah dibuat dalam borang sebagaimana yang dinyatakan dalam Jadual Keempat.

(3) Ketua Pengarah boleh, selepas menimbangkan permohonan yang dibuat di bawah subperaturan (1), meluluskan atau menolak permohonan itu.

(4) Ketua Pengarah hendaklah memberitahu pemohon tentang keputusannya yang dibuat di bawah subperaturan (3) mengikut cara yang difikirkan patut oleh Ketua Pengarah.

(5) Apabila diberitahu tentang kelulusan itu, pemohon hendaklah membayar fi aktiviti di bawah subperaturan 3(2) atau fi perkhidmatan pelancongan di bawah subperaturan 3(4), mengikut mana-mana yang berkenaan, dan Ketua Pengarah hendaklah mengeluarkan permit kepada pemohon.

(6) Ketua Pengarah boleh—

(a) mengenakan apa-apa syarat ke atas permit yang dikeluarkan; atau

(b) menambah, mengubah atau membatalkan apa-apa syarat yang dikenakan ke atas permit.

(7) Mana-mana orang yang melanggar apa-apa syarat yang dikenakan oleh Ketua Pengarah melakukan suatu kesalahan dan boleh, apabila disabitkan, didenda tidak melebihi satu ribu ringgit atau dipenjarakan selama tempoh tidak melebihi enam bulan atau kedua-duanya.

(8) Suatu permit, melainkan jika terlebih dahulu digantung atau dibatalkan, hendaklah sah selama apa-apa tempoh yang dinyatakan dalam permit itu.

(9) Pemegang permit hendaklah membawa permit pada setiap masa apabila berada di dalam Taman dan hendaklah mengemukakan permit itu apabila diminta oleh pegawai.

(10) Pemegang permit tidak boleh menyerah hak apa-apa hak, kewajipan, tanggungan atau obligasi di bawah permit itu kepada mana-mana orang lain.

(11) Mana-mana orang yang melanggar subperaturan (1), (9) atau (10) melakukan suatu kesalahan dan boleh, apabila disabitkan, didenda tidak melebihi satu ribu ringgit atau dipenjarakan selama tempoh tidak melebihi enam bulan atau kedua-duanya.

Penggantungan atau pembatalan permit

5. (1) Ketua Pengarah boleh pada bila-bila masa menggantung atau membatalkan permit yang dikeluarkan di bawah Peraturan-Peraturan ini jika—

- (a) pemegang permit telah melanggar apa-apa syarat yang dikenakan dalam permit;
- (b) pemegang permit telah melanggar mana-mana peruntukan di bawah Peraturan-Peraturan ini; atau
- (c) pemegang permit telah disabitkan dengan suatu kesalahan di bawah subperaturan 4(7).

(2) Seseorang pegawai hendaklah mempunyai kuasa untuk membawa keluar pemegang permit yang permitnya telah digantung atau dibatalkan untuk meninggalkan Taman.

(3) Mana-mana orang yang menggalang pegawai dalam menunaikan kewajipannya di bawah subperaturan (2) melakukan suatu kesalahan dan boleh, apabila disabitkan, didenda tidak melebihi satu ribu ringgit atau dipenjarakan selama tempoh tidak melebihi enam bulan atau kedua-duanya.

Kehilangan permit

6. (1) Jika suatu permit hilang, pemegang permit hendaklah menghentikan apa-apa aktiviti yang dibenarkan di bawah permit dan hendaklah dengan segera memaklumkan Ketua Pengarah mengenai kehilangan itu.

(2) Pemegang permit hendaklah memohon kepada Ketua Pengarah bagi suatu salinan permit itu.